

Ok ensal neyn unsir borgere edir medewonere, de elderen hebben, syne elderen vor knechte, megede eddir vor gesinde vordedingen edir innemen darumme, dat se nicht schoten dorven. We dat darenboven deide, solde twe vorschot geven unde noch solden de elderen glikewol schoten.

Item so sal neymant erve effte gudere buten dussir stad innynge verkopen, vorsetten ^{a)} edder vorgeven, dat hir in diit schot hort. We dat hirenboven deide, de solde dat wedir in dusser stad innynge unde schot bringen unde verböten dat na des ^{b)} rades werderinge.

We ok over jar den andern geherberget hefft, dat sii frawe edir man, sal dem rade tor stad schote unde plicht antwerden.

Ok ensal neymant utluden huse edir boyden vermeyden, verkopen ^{c)}, noch in ore husinge nemen sunder weten unde willen des rades. We dat darenboven dede, de solde deme raide I punt geven, so vaken unde vele he dat dede, unde ^{d)} de koip effte vermedinge ensolde neyne macht hebben ane fulbort des raides.

Vortmer ^{e)} we dar hefft eyne wöste husstede, dar hus uppe stan hefft, so mannige he der hefft, so mannige mal negen schillinge unde de wachte sal he darvon to vorschote geven. Unde we des nicht don wolde, de solde se deme rade tor stad behoiff liggen laten, der stad beste darmede to donde. Wolde ok eymant der stede welk buwen von inkomelingen edir borgeren, so solde dejenne, de se hedde, de laten von sek komen na werderinge des rades edir sulves buwen.

Ok ensal neymant unsir borgere edir medewonere den joden eygen husinge verkopen noch versetten edir vorpenden, unde we dat hirenboven deide, solde dat verboten na des ^{f)} rades werderinge.

^{a)} vorsetten edder vorgeven gleichzeitiger Zusatz über der Zeile. ^{b)} Vor des durchstrichen gnaden. ^{c)} verkopen Zusatz über der Zeile. ^{d)} unde-raides Zusatz. ^{e)} Fol. 3'. ^{f)} Vor des durchstrichen gnaden (?), werderinge Zusatz.